


Headline	Sempadan tak bolos		
MediaTitle	Berita Harian		
Date	14 Apr 2020	Color	Full Color
Section	Nasional	Circulation	82,252
Page No	4	Readership	246,756
Language	Malay	ArticleSize	387 cm ²
Journalist	N/A	AdValue	RM 12,815
Frequency	Daily	PR Value	RM 38,445



Pasukan unit rondaan bermotosikal PGA memperketat rondaan dari Kuala Jambu, Tumpat sehingga Jeram Perdah, Rantau Panjang, Kelantan sepanjang PKP dilaksana. (Foto Siti Rohana Idris/BH)

Sempadan tak bolos

Pihak berkuasa perketat kawalan sekat aktiviti pencerobohan

Kuala Lumpur: Kawalan di sempadan negara termasuk di lorong tikus dipertingkatkan sepanjang tempoh Perintah Kawalan Pergerakan (PKP) sehingga tiada insiden pencerobohan pendatang asing tanpa izin dikesan setakat ini.

Menteri Kanan (Keselamatan), Datuk Seri Ismail Sabri Yaakob, berkata sempadan negara sentiasa dikawal ketat pasukan keselamatan terdiri daripada Polis Diraja Malaysia (PDRM), Angkatan Tentera Malaysia (ATM), Jabatan Imigresen dan Agensi Kawalan Sempadan Malaysia (AKSEM).

Ismail Sabri berkata, ramai yang menyuarakan kebimbangan mengenai kawalan kita di sempadan terutama di 'jalan tikus', namun beliau memberi jaminan bahawa ia sentiasa dikawal anggota penguat kuasa bertugas.

"Kita dapat laporan daripada Polis Diraja Malaysia, Angkatan Tentera Malaysia dan Agensi Pertahanan Awam Malaysia bahawa pintu sempadan negara sentiasa dikawal terutama jalan-jalan tikus digunakan oleh pendatang asing tanpa izin.

"Seperti kita tahu, sempadan kita sudah ditutup daripada ke-



Anggota PGA meronda sempadan Malaysia-Thailand di Tumpat.

(Foto BERNAMA)

masuk semua warga asing dan 'jalan tikus' juga sentiasa dipantau untuk memastikan tiada warga asing menyeludup masuk.

"Tindakan tegas akan diambil kepada mana-mana warga asing yang masuk melalui 'jalan tikus' ini," katanya selepas Mesyuarat Khas Menteri-Menteri Mengenai Pelaksanaan PKP di Perdana Putra di Putrajaya, semalam.

Ismail Sabri berkata, selain di darat, sempadan perairan negara juga turut dikawal ketat oleh Tentera Laut Diraja Malaysia (TLDM) dan Agensi Penguatkuasaan Maritim Malaysia (APMM) bagi menghalang pencerobohan termasuk oleh bot nelayan asing.

"Tindakan yang tegas akan diambil bagi menghalang kemasukan dan tindakan mengusir mereka keluar daripada perairan kita akan dilakukan," katanya.

Dalam perutusan khas pada 10 April lalu, Perdana Menteri, Tan

Sri Muhyiddin Yassin mengarahkan semua agensi keselamatan supaya memperketatkan kawalan di sepanjang sempadan negara.

Ia bertujuan mengelak pendatang asing tanpa izin membolosi lorong tikus di sempadan negara, sekali gus memberi ruang membawa masuk COVID-19 ke dalam negara.

"Di sepanjang sempadan negara, ada lorong tikus yang digunakan warga asing untuk keluar dan masuk ke negara kita. Jika kita tidak tingkatkan kawalan, mereka mungkin bolos dan membawa virus masuk ke negara kita. Na'uzubillah.

"Jadi, saya arahkan Ketua Polis Negara, Panglima Angkatan Tentera, Ketua Pengarah Agensi Penguatkuasaan Maritim Malaysia, Imigresen, RELA dan lain-lain agensi yang berkaitan supaya perketatkan kawalan di sepanjang sempadan negara," katanya.